

## Liderato efektivu

Mi no ta asosiá e palabra 'lider' ku kos bon. Esaki ta probablemente pasó mi ta un babyboomer (aña di fabrikashon 1954). Mi generashon a lanta ku ideanan di lider- i diktadornan outoritario manera Adolf Hitler, Joseph Stalin i Benito Mussolini. For di chikí nan a siña nos ku e kombinashon di lider i siguidónan por resultá den miones di morto inocente

Naturalmente esaki ta solamente un aspekto (limitá) di liderato. Liderato efektivu ta nesesario i hasta un kondishon apsoluto pa hasi negoshi di forma efektivu. P'esei 'liderato' ta un tópiko prominente den corporate governance. E bon notisia ta ku liderato efektivu ta algu ku bo por siña. A yega di hasi diferente estudio riba liderato efektivu. Algun punto komun importante di e estudionan ei ta lo siguiente.

Lidernan efektivu ta pensadó- i hasidónan independiente. Nan ta asumí responsabilidad pa nan propio akshonnan. Nan no ta hasi nan mes dependiente di inisiativa- i instrukshonnan di otro. Nan no ta wardadónan sino kanadónan. Nan no ta tira un kabes di soño bou di un palu, pero nan ta hasi algu ku e palu: traha un bohio, piki e frutanan, zag e pone abou.

Lidernan efektivu no ta komportá nan mes, loke hopi hende ta hasi, manera un hende zorokloko. Nan ta fiha pa nan mes i pa e organisashon, un meta mas ayá. E meta akí ta e lus di faro ku nan ta fiha nan pensamentu- i akshonnan riba dje. Kòrtiku bisá, nan tin vishon.

Lidernan efektivu ta pone prioridat. Awendia esaki yama 'focus' pa uza un palabra moderno. Ta hopi fásil pa bo laga e pensamentu di momentu guiabo. Micromanagement tambe ta un tentashon grandi. Un lider efektivu ta kaba ku su prioridatnan na un manera sistemátiko i efektivu.

Lidernan efektivu ta duna mas ku nan ta tuma. Mayoria hende, konsientemente òf inkonsientemente ta okupá ku garantisá nan seguridat dor di kue òf tuma. Un lider efektivu no ta hasi esaki. E sa ku un resultado win/win no solamente ta deseabel, sino práktikamente semper e ta posibel tambe.

Lidernan efektivu ta skucha mas ku nan ta papia. Nan ta bisa loke nan ta pensa òf loke mester sosodé segun nan, na momentu numa ku nan a skucha i komprondé hopi bon kon nan koleganan ta pensa riba tal kos.

---

Lidernan efektivu ta pone nan propio desaroyo permanente i esun di nan empleadonan riba tur kos. Nan sa ku paramentu ketu i status quo pa definishon ta hiba na atraso i perdishon.

Lidernan efektivu ta inspirante i kada biaha nan ta duna e bon ehèmpel. Bon mirá, e último akí ta un resúmen di e puntonan anterior.

Bo ta un manager? Hopi bon, e ora ei bo por ta un lider tambe. Kon? Masha simpel. E ora ei djawó padilanti bo ta hasi e kosnan ku ta bon na lugá di hasi e kosnan bon. Bo ta wak mas tantu padilanti ku patras. Na lugá di ta solamente inteligente, bo ta skucha bo kurason tambe, bo 'gut-feeling', un kombinashon di loke huristanan ta yama rasonabilidad i hustisia. Bo ta konsiderá rísikonan tambe komo chènens na lugá di evitá nan kada bes. Bo ta hasi mas esfuerso pa yega na kambio ku na ordenamentu. Lo bo keda babuká di e resultadonan.



[Frank Kunneman](#)

VanEps Kunneman VanDoorne  
Partner

T [+5999 461 3400 ext. 254](tel:+59994613400)

E [kunneman@ekvandoorne.com](mailto:kunneman@ekvandoorne.com)

---